

تياب الحلم

من أول حرف ... ف أول سطر

والقلم الرافض ذله..

بيرفض زمن القهر

من أول كلمه...

سؤال جوايا.. بيحفر حفر

من إمتى الميت من حقه

يصرخ بعد الموت ؟؟

من إمتى الحق يبان

ف زمان مشنوق؟؟

عاش عمره جراح

وبصوت مخنوق

قال جاي يتحرر بعد مامات

وحتى ان مات....

مين بعد الموت...

راح يزرع همسة صوت

ف قلوب مظلومه

مين هاينادي الشمس الدافيه

ف عتمة ليل

والناس محرومه

مين هايصدق إن حطام البيت

كات في الأصل

حيطان مسمومه

ماتت جوه قلوب الناس

أحلام مكتومه

صرخت

جوه حدود الخوف

وياريت بتشوف

طب إمتى الناس

ف تياب الحلم تنام

إمتى العين

هاتلاقي قصاها براح

ويغمض فيها الرمش السارح

فوق أنهار الحلم الأخضر

مهما ان راح



يا نجوم الكون بصّي لي
ونوّري ليلى
وافردي توب الفجر قصادي
تقيد قناديلي
وابعتي كل طيور الكون
تنشد مواويلي
مهما ان طال الظلم ف جوفنا
مهما ان عشش فوق شفايفنا
راح يفضل حلمنا طول العمر
كلمة حق هاتطلع منّا
حتى ان موتنا

....